

## 2 Yohanis

### *Tabe ma haan buseet*

<sup>1</sup> Ain honi'! Surat re' ia na'ko au nai' Yohanis kau, re' 'jair a'naak akrei.

Au 'tui surat re' ia ma 'soun ee 'eu ko ain re' Uisneno npaek ko mjair Iin ja, ma 'eu ho aanh ein.\* Au 'neek ki ok-oke' re' hi neekm ein anmafutun nok rasin re' batuur. Are' too mfaun re' nahinin rasin re' batuur, anneek ki msa'. <sup>2</sup> Hai mneek ki, natuin rasin re' batuur anseen ok anbi hit nekak, ma of anmooin nabaraa'anbi hit nekak nanan.

<sup>3</sup> Au 'onen he 'toit Uisneno ma In Anah, Yesus Kristus, he naruru' ma nakrira' Sin nekak arekot nok rais kasian neu kit, he hit bisa tmoin atbi mamut, rame' es nok es, ma tainina', tmoni tbi rais manekat, ma tmafuut piut tok rasin re' batuur.

### *Ammoni mbi manekat es nok es, ma amnaa' miher-heran rasin re' batuur*

<sup>4</sup> Au 'mariin a'maet oras au uteef 'ok ho aanh ein bian, ma 'kius sin nmonin nok rek-reko, natuin raan a'honis re' batuur, on re' Ama' Uisneno naprenat anrair neu kit.

---

\* **1:1** Anmu'i atoin ahinit bian re' nateenb ein nak, of oni' bifee re' ia nok in aanh ein, es re' tuaf es re' nai' Yohanis nahiin narek-reok' ee na'ko unu'. Sin nua sin nabu-buan nanaob niit Uisneno In mepu. Atoin ahinit bian antein nateenb ein nak, nai' Yohanis anpaek kaan ma'nifa', re' nak, bifee re' ia nok in aanh ein naan, es re' jema'at es nok iin na.

**5** Ain honi'! Oras ia au 'toit he hit ok-oke' tmoni tbi manekat. Rasi re' au 'toit je naan, ka preen feu' goa fa, mes au suma umnaub aprenat re' hit tnaa' tain je ta'ko un-unu'.<sup>5</sup> **6** Hit bisa taruru' ma takrira' hit manekat, karu hit tmoe' tatuin Uisneno In apreent ein. Na'ko unu', In naprenat anrair kit he tmoni tbi manekat es nok es. Rasi ia ka rais feu' goa fa, fin hi mneen amrair prenat ia na'ko unu'.

**7** Aputa-kriut amfaun annaon nfuun am nateef anbin pah-pinan ia. Sin nanooin ein neu tuaf am nak, Yesus Kristus neem anbi pah-pinan ia, mes In ka mansian batuur fa. Sin nputa-kriun amsa', re' nraban Kristus, ma ka nromin fa he ntoupun nak, Nai' Yesus naan es re' Kristus, Tuaf re' Uisneno npiir nain Je na'ko unu'. **8** Ampaant om rek-reko, he hit maskeet aan kais namneuk. Onaim hi ro he mmakoena' mepu piut-piut, he hi bisa mipein tetus-athoen ok-oke' re' Uisneno nba'an he nfee ki nbi sonaf neno tunan.

**9** Fin tuaf re' nbeon on na'ko Kristus In noni', in ka nmafuut fa nok Uisneno. Mes tuaf re' nnaa' naheer noni' naan, in nmafuut nok Uisneno ma In Anah, Yesus Kristus.

**10** Karu nmui' tuaf re' neem nanoni' rasin re' ka batuur fa nmatoom nok Kristus, kais amtoup goe mbi hi umin, ma kais amfei hi neekm ein meu ne. **11** Fin karu hi mfei hi neekm ein meu ne, hi mipein imrair sapaaf ambi in mepu re' maufinu naan.

### *Nai' Yohanis nasoup in surat*

**12** Anmu'i nteni' rasi mfaun re' au 'roim he utoon ki, mes reko nneis au kais a'tui 'bi surat.

---

<sup>5</sup> **1:5** Nai' Yohanis 13:34, 15:12,17

Fin ka 'roo fa ntein, au he 'uum, he u'uab 'ain 'ok  
ki, he hit batuur-batuur bisa tmariin bu'-bua'.

<sup>13</sup> Uisneno npiir ho tata' msa'. In aanh ein  
ansoun ein haan tabes ma haan buseet neu sin  
aina' sin etan naan.

On re' naan, tua.

Haan buseet na'ko au,  
nai' Yohanis kau, tua.

**Uisneno In Kabin ma Prenat: Rais Manba'an  
Fe'u nok Reta' Ahun-hunut  
Genesis and the New Testament in the Amarasi  
language of Indonesia  
Kejadian dan Perjanjian Baru dalam bahasa Amarasi  
dari**

copyright © 1999-2014 Unit Bahasa dan Budaya, Kupang NTT, Indonesia

Language: Amarasi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 30 Nov 2021  
60603d94-9a14-5831-a729-e3ba7b0ebc25